

西南史地文獻

第二十卷

中國西南文獻叢書



中國西南文獻叢書·第三輯

西南史地文獻

第二十卷



本輯主編：繆文遠

副主編：徐麗華

張振興

辛佩峰

本卷目錄

西藏圖考

〔清〕黃壽菩撰

.....

一

【清】黃壽菩 撰

西藏圖考

《西藏圖考八卷首一卷》，清黃壽菩撰。壽菩字沛翹，楚南人。本書爲撰者戎邊官蜀時博采編輯而成，清光緒二十年（公元一八九四年）秋滇南李培榮鐫刻，河間李文江、楚南陳兼善校刊，卷首有顧復初、黃錫濤、崔廷璋序。原書尺寸二十乘十二點三厘米，版框尺寸十五點六乘十一厘米。

光緒甲午秋鑄

西藏圖考

顧復初署檢

聖祖仁皇帝御製平定西藏碑文

昔者

太宗文皇帝之崇德七年班禪額爾德尼達賴刺麻固始汗謂東土有聖人出特遣使自人跡不至之區經讐敵之國閱數年始達盛京至今八十載同行善事俱爲施主頗極安寧後達賴刺麻之歿第巴隱匿不奏者十有六年任意妄行拉藏滅之復興其法因而允從拉藏苦苦腦兒羣衆公同之請中間策妄阿喇蒲坦妄生事端動準噶爾之衆肆行奸詐滅壞達賴刺麻并廢第五輩達賴之塔辱巖班禪毀壞寺廟殺戮刺麻名爲興教而實滅之且欲竊據圖伯特國朕以其所爲非法爰命皇子爲大

將軍王又遣朕子孫等調撥滿洲蒙古綠旗兵各數萬歷烟瘴之地土馬安然而至賊眾三次乘夜盜營我兵奮勇擊殺賊皆喪膽遠遁一矢不發平定西藏振興法教賜今虎必爾汗冊印封爲第六輩達賴刺麻安置禪榻撫綏圖伯特僧俗人眾各復生業於是文武臣工咸謂王師西討歷瘴癘險遠之區曾未半載輒建殊勲實從古所未有而諸蒙古部落及圖伯特酋長亦合詞奏曰皇帝勇畧神武超越往代天兵所臨邪魔掃蕩復興蒙古向所尊奉法教坎麻藏衛等部人眾咸得拔離湯火樂土安居如此盛德大業非臣下頌揚所能宣罄請賜御製碑文鐫勒招地以垂永久朕以何功焉而羣眾勤請不已爰紀斯文立

石西藏俾中外知達賴刺麻等三朝恭順之誠諸部落累世崇奉法教之意朕之此舉所以除逆撫順綏眾興教云爾

康熙五十九年

上諭大學士學士九卿等曰朕於地理從幼留心凡古今山川名號無論邊徼遐荒必詳考圖籍廣詢方言務得其正故遣使臣至崑崙西番諸處凡大江黃河黑水金沙瀾滄諸水發源之地皆目擊詳求載入輿圖今大兵得藏邊外諸番悉心歸化三藏阿里之地俱入版圖其山川名號番漢異同當於此時考證明核庶可傳信於後大概中國諸大水皆發於東南諸莫渾烏巴西大幹內外其源委可得而縷析也黃河之源出西甯外枯爾

坤山之東眾泉渙散不可勝數望之燦如列星蒙古謂之敖敦他拉西番謂之梭羅木中華謂之星宿海是爲河源匯爲薩陵鄂陵二澤東南行折北復東行由歸德堡積石關入蘭州岷江之源出於黃河之西巴顏哈拉嶺七七喇哈納番名岷尼雅克撮漢書所謂岷山在西徼外江水所出是也而禹貢導江之處在今四川黃勝關外之乃褚山古人謂江源與河源相近禹貢岷山導江乃引其流非源也斯言實有可據其水自黃勝關流至灌縣分數十支至新津縣復合而爲一東南流至敘州府與金沙江合流金沙江之源自達賴刺麻東北烏尼尹烏蘇嶺流出烏尼尹烏蘇嶺中華謂之乳牛山也其水名穆魯斯烏蘇東

南流入喀木地又經中甸入雲南塔城關名金沙江至麗江府
又名麗江至永北府會打衝河東流經武定府入四川界至敘
州府流入岷江經夔州府入湖廣界由荊州府至武昌府與漢
江合漢江源出陝西寧羗州北嶓冢山名漾水東流至南鄭縣
爲漢水入湖廣界東南流至漢陽縣漢口合岷江此諸水在東
南諾莫渾烏巴西大幹之內源發於西番委入於中國也瀾滄
江有二源一源於喀木之格爾幾雜噶爾山名雜褚河一源於
濟魯肯他拉名敖穆綽河二水會於察木多廟之南名拉克褚
河流入雲南境爲瀾滄江南流至車里宣撫司名九龍江流入
緬國瀾滄之西爲哈喇烏蘇卽禹貢之黑水今雲南所謂潞江

也其水自達賴喇嘛東北哈拉腦兒流出東南流入喀木界又東南流入怒夷界爲怒江入雲南大塘隘更名潞江南流經永昌府潞江安撫司境入緬國潞江之西爲龍川江龍川江之源從喀木所屬春多嶺流出南流入雲南大塘隘西流爲龍川江至漢龍關入緬國此諸水在東南諾莫渾烏巴西大幹之外皆流入南海也又雲南邊境有檳榔江者其源發自阿里之岡底斯東達木朱喀巴卜山譯言馬口也一泉流出爲雅魯藏布江從南折東流經藏角地過日噶公喀爾城旁合噶爾詔模倫江又南流經公布部落地入雲南古勇州爲檳榔江出鐵壁關入緬國而岡底斯之南有山名郎干喀巴卜譯言象口也有泉流

出入馬皮木達賴又流入耶噶腦兒兩河之水西流至桑南地岡底斯之北有山名僧格喀巴卜譯言獅子口也有泉流出西行亦至桑南地二水合而南行又折東行至那克拉蘇穆多地與岡底斯西馬卜家喀巴卜山所出之水會馬卜家喀巴卜者譯言孔雀口也其水南行至那克拉蘇穆多地會東行之水東南流至厄納忒可克國爲岡噶模倫江卽佛法所謂恒河也佛國紀載魏法顯順恒河入南海至山東之渤海入口應卽此水矣梵書言四大水出於阿耨達山下有阿耨達池以今考之意卽岡底斯是唐古特稱岡底斯者猶云眾山水之根與釋典之言相合岡底斯之前有二湖連接土人相傳爲西王母瑤池意

卽阿耨達池又梵書言普陀山有三一在厄納忒可克之正南海中上有石天宮觀自在菩薩遊舍是云眞普陀一在浙江之定海縣海中爲善財第二十八參觀音菩薩說法處一在土伯特今番名布塔拉山也亦謂觀音見身之地釋氏之書本自西域故於彼地山川亦可引以爲據也禹貢導黑水至於三危舊註以三危爲山名而不能知其所在朕今始考其實三危者猶中國之三省也打箭鑪西南達賴刺麻所屬爲危地拉里城東南爲喀木地班禪額爾德尼所屬爲藏地合三地爲三危耳哈拉烏蘇由其地入海故曰導黑水至於三危入於南海也至於諸番民號雖與史傳不同而亦有可據者今之士伯特卽唐